

纜船苦風戲題四韻奉簡鄭十三判官^①

鶴注：此大曆三年冬在岳陽作。

楚一作東岸朔風疾，天寒鵲鵲音括呼^②。漲沙蘼草樹^③，舞雪渡江湖^④。吹帽時時落，維舟日
日孤。因聲置驛外^⑤，爲去聲覓酒家壚^⑥。上四風寒之景，下四泊舟簡鄭。沙蘼雪渡，風狂所致。此時舟
中落帽，故欲索酒以禦寒，所謂戲題也。

①《爾雅翼》：蒼麋，其色蒼，如麋也，一名鵲鹿。《本草》：狀如鶴而頂無丹，兩頰紅。《西都賦》：鳥則鵲鵲，汎浮往來。

②丘遲詩：森森荒樹齊，析析寒沙漲。

③古詩：扁舟載風雪，半夜渡江湖。

④因聲，猶云寄語。《漢書》：鄭莊置驛，請謝賓客。此比鄭判官也。人遞曰置，馬遞曰驛。

⑤《司馬相如傳》：文君當壚。顏師古曰：賣酒之處，累土爲壚，以居酒甕。四邊隆起，其一面高，形如鍛壚，故名壚耳。世人皆以當壚爲對溫酒火壚，失其義矣。

登岳陽樓

鶴注：當是大曆三年作。

《岳陽風土記》：岳陽樓，城西門樓也，下瞰洞庭景物寬闊。

盧注：是年郭子儀將兵五

萬屯奉天，備吐蕃，白元光、李抱玉各出兵擊之，是「戎馬關山北」也。

昔聞洞庭水^①，今上上聲岳陽樓。吳楚東南坼^②，乾坤日夜浮^③。親朋無一字^④，老病有孤

舟⑤。戎馬關山北⑥，憑軒涕泗流⑦。上四寫景，下四言情。昔聞今上，喜初登也。包吳楚而浸乾坤，此狀樓前水勢。下則隻身漂泊之感，萬里鄉關之思，皆動於此矣。《杜臆》：三四已盡大觀，後來詩人，何處措手？下四只寫情，方是做自己詩，非泛詠岳陽樓也。黃生曰：末以憑軒二字，綰合登樓。

①《國策》：吳起曰：「左有彭蠡之波，右有洞庭之水。」葉秉敬曰：或疑洞庭楚地，何遠及於吳？考《荊州記》，君山在洞庭湖中，上有道通吳之包山。今吳之太湖，亦有洞庭山，以潛通君山，故得名。或疑「乾坤日夜浮」，有似詠海。考《水經注》，洞庭湖廣五百里，日月若出沒其中。又《拾遺記》：洞庭山浮於水上。方知杜句所云，皆是洞庭本色。

②《三輔黃圖》：南極吳楚。《史記·趙世家》：地坼東南。

③謝朓詩：大江日夜流。

④又有酒招親朋。

⑤《歸去來辭》：或棹孤舟。

⑥《道德經》：戎馬生於郊。《恨賦》：關山無極。

⑦《登樓賦》：憑軒檻以遙望兮。張載詩：登崖遠望涕泗流。鼻出曰涕，目出曰泗。

黃生曰：前半寫景，如此闊大，五六自敘，如此落寞，詩境闊狹頓異。結語湊泊極難，轉出「戎馬關山北」五字，胸襟氣象，一等相稱，宜使後人攔筆也。

《金玉詩話》云：洞庭天下壯觀，自昔騷人墨客，闢麗搜奇者尤衆。如「水涵天影闊，山拔地形高」，「四望疑無路，中流忽有山」，「鳥飛應畏墮，帆遠却如閒」，皆見稱於世。然莫若「氣蒸雲夢澤，波撼岳陽城」。則洞庭空曠無際，雄壯如在目

前。至讀杜子美詩，則又不然。「吳楚東南坼，乾坤日夜浮」，不知少陵胸中，吞幾雲夢也。

唐庚《子西文錄》：「嘗過岳陽樓，觀子美詩，不過四十字耳，其氣象闊放，涵蓄深遠，殆與洞庭爭雄，所謂富哉言乎者。太白、退之輩，率爲大篇，極其筆力，終不逮也。杜詩雖小而大，餘詩雖大而不小。」

黃鶴曰：「一詩之中，如『吳楚東南坼，乾坤日夜浮』一聯，尤爲雄偉。雖不到洞庭者讀之，可使胸次豁達。」

方回曰：「嘗登岳陽樓，左序移門壁間大書孟詩，右書杜詩，後人不敢復題。劉長卿云：『疊浪浮元氣，中流沒太陽。』世不甚傳，他可知矣。」

趙汭曰：「公此詩，同時惟孟浩然臨洞庭所賦，足以相敵。後則陳簡齋渡江，及朱文公登定王臺所賦，最迫近之。浩然詩云：『八月湖水平，涵虛混太清。氣蒸雲夢澤，波撼岳陽城。欲濟無舟楫，端居耻聖明。坐看垂釣者，徒有羨魚情。』簡齋詩云：『江南非不好，楚客自生哀。搖楫天平渡，迎人樹欲來。雨餘吳岫立，日照海門開。雖異中原險，方隅亦壯哉。』朱文公詩云：『寂寞番君後，光華帝子來。千年餘故國，萬事只空臺。日月東西見，湖山表裏開。從知爽鳩樂，莫作雍門哀。』」

葉秉敬《敬君詩話》：「張祜詩：『一宿金山寺，微茫水國分。僧歸夜航月，龍出曉堂雲。樹影中流見，鐘聲兩岸聞。因悲在城市，終日醉醺醺。』此詩可取在第二聯。或云僧亦有晝歸者，何偏云夜航月耶？不知旦出暮歸，人情之常。況稱夜月，則景色清迥，此當以意融會，不必苛責也。至云『龍出曉堂雲』，則分明畫出寺在江中之景，逼真甚矣，此二句已盡其狀。至云『樹影中流見』，頗欠天趣。又云『鐘聲兩岸聞』，更復著相。且四句俱說景，似堆垛而無清味。老杜洞庭只是兩句，而下便云『親朋無一字，老病有孤舟』，方見變化之妙。」

楊慎曰：「昔過岳陽樓，見一詩云：『樓上元龍氣不除，湖中范蠡意何如？西風萬里一黃鶴，秋水半江雙白魚。鼓瑟至

今悲二女，沉沙何處弔三閭。朗吟仙子無人識，騎鶴吹簫下碧虛。視其姓名，乃元人張翔，字雄飛，不知何地人也。雄飛在元，不著詩名，然詩實可傳。同時，虞伯生、范德機皆有岳陽樓詩，遠不及也。

陪裴使去聲君登岳陽樓

鶴注：當是大曆四年春作。使君必岳州守，故詩用陳蕃事。

湖闊兼雲霧，樓孤屬之玉切晚晴。禮加徐孺子，詩接謝宣城。雪岸叢梅發，春泥百草生。敢違漁父問，從此更南征。首二登岳陽樓，三四陪裴使君，五六樓前春景，七八自敘行踪，此虛實相間格也。一日之間，陰晴迭換，亦見登眺之久，黃生謂可當岳陽樓圖是也。徐禪自方，謝朓比裴。屈原至江濱，漁父勸其與世推移。公旅況依人，故不敢違漁父之問而更欲南征。南征，指潭州。《杜臆》：落句深有意於裴，言己不異屈原之放逐，漁父倘肯見問，豈敢違之而更南征乎。此另一說。

○闊，與孤相照。屬，當也。

○後漢徐孺子，豫章南昌人。時陳蕃爲太守，以禮請署功曹。

○《謝朓傳》：除秘書丞，未拜，仍轉中書郎，出爲宣城太守。

○《楚辭》：屈原既放，遊於江潭，漁父見而問之。

○《離騷》：濟沅湘兮南征。

黃生曰：一二，目前景，所以興三四。五六，意中景，所以起七八。格局莊凝，句法精鍊，詞旨深渾，從來人止膾炙前作耳。蓋彼詩之妙易見，此詩之蘊難窺也。